

太乙救苦护身妙经



太一救苦護身妙經

凡誦經者切須齋戒。嚴整衣冠。誠心定氣。叩齒演音。然後朗誦。慎勿輕慢。交談接語。務要端肅。念念無違。隨願禱祝。自然感應。

香讚

爐烟起篆 道炁騰祥 誠心一炷噴天香  
繚繞透穹蒼 周遍十方 諸神現金光

太上玉華散景香雲浮蓋大天尊 三稱

淨心神呪

太上台星 應變無停 驅邪縛魅

一 靈九道壇印册

保命護身

智慧明淨

心神安甯

三魂永久

魄無喪傾

急急如律令

淨口神呪

丹朱口神

吐穢除氛

舌神正倫

通命養神

羅千齒神

却邪衛真

喉神虎賁

氣神引津

心神丹元

令我通真

思神煉液

道炁長存

急急如律令

淨身神呪

靈寶天尊

安慰身形

弟子魂魄

五臟玄冥

青龍白虎

隊仗紛紜

朱雀玄武

侍衛身形

急急如律令

安土地神呪

元始安鎮

普告萬靈

嶽瀆真官

土地祇靈

左社右稷

不得妄驚

回向正道

內外澄清

各安方位

備守家庭

太上有命

搜捕邪精

護法神王

保衛誦經

皈依大道

元亨利貞

急急如律令

淨天地解穢呪

天地自然

穢氣分散

洞中玄虛

晃朗太元

八方威神

使我自然

靈寶符命

普告九天

乾羅答那

洞罡太玄

斬妖縛邪

殺鬼萬千

中山神呪

元始玉文

持誦一遍

却鬼延年

按行五嶽

入海知聞

魔王束首

侍衛我軒

凶穢消散

道炁長存

急急如律令

金光神呪

天地玄宗

萬炁本根

廣修萬劫

證吾神通  
體有金光  
聽之不聞  
受持萬遍  
五帝司迎  
鬼妖喪膽  
雷神隱名  
金光速現

三界內外  
覆映吾身  
包羅天地  
身有光明  
萬神朝禮  
精怪亡形  
洞慧交徹  
覆護真人

惟道獨尊  
視之不見  
養育羣生  
三界侍衛  
役使雷霆  
內有霹靂  
五炁騰騰  
急急如律令

祝香呪

道由心學

心假香傳

香爇玉爐

心存帝前 真靈下盼 仙旆臨軒

令臣關告 逕達九天

啓請頌

救苦天尊妙難求 身披霞衣累劫修

五色祥雲生足下 九頭獅子道前遊

盂中甘露常將灑 手內楊枝不計秋

千處請師千處應 愛河常作渡人舟

太一救苦天尊 三稱

開經偈

寂寂至無宗 虛峙劫仞阿 豁落洞玄文



誰測此幽遐

一入大乘路

孰計年劫多

不生亦不滅

欲生因蓮花

超凌三界途

慈心解世羅

真人無上德

世世爲仙家

# 太一救苦護身妙經

爾時。

元始天尊在玄景之上清微天中九色玉堂昇  
七寶座。放大光明。普集萬靈。與天教化十方天  
尊。道君。老君。帝君。元君。丈人。聖人。萬萬仙衆。俱  
來詣座。聽宣妙法。於是梵王稱善。帝釋欣歌。仙  
樂自響。隨光而至。是時。

太上老君身離玉座。步躡蓮花。真人侍於左右。  
玉女扶於曳裾。至

天尊前奏曰。臣等蒙師開化。受福天堂。施功無  
極。恩不可量。臣觀三界之中。苦海之內。無量衆  
生。橫遭厄難。罪網牽纏。異類羣情。難逃生化。臣  
不可住於太清。欲仗威光。分身三界。救度羣情。  
惟望

至尊觀心慈愆。於是

元始天尊微起法身告

老君曰。善哉善哉。汝離玉座。驚怖萬天。救苦救

生不須汝言。可還座中。吾爲宣說。  
天尊曰。萬物吾生。萬靈吾化。遭苦遭厄。當須救  
之。不須汝威力化身救度。此東方長樂世界有  
大慈仁者。太一救苦天尊。化身如恒沙數。物隨  
聲應。或住天宮。或降人間。或居地獄。或攝羣邪。  
或爲仙童玉女。或爲帝君聖人。或爲天尊真人。  
或爲金剛神王。或爲魔王力士。或爲天師道士。  
或爲皇人老君。或爲天醫功曹。或爲男子女子。  
或爲文武官宰。或爲都大元帥。或爲教師禪師。  
或爲風師雨師。神通無量。功行無窮。尋聲救苦。

應物隨機。今告汝知。

老君重奏曰。此之威神。有無量變化。如何得至

我師御前。

天尊告老君曰。汝可舉聲唱太一之名。使仙官

齊詠。自然應化現身。於是

老君衆仙等。遵其教旨。齊聲稱詠太一救苦天

尊之名。忽見帝君班中有童子一人。步步躡於

蓮花。稽首至

天尊前。奏曰。臣乃太一。爲我師開化說法。臣集

相聚形。聽宣妙音。天中快樂一時。地下動經萬

劫。三界之中。羣生受苦。高聲叫喚。苦哉苦哉。旋遶。

天尊禮拜俯伏。乞下天關。於是衆仙見童子。奏對泣淚滴衣。哽噎嘆言。天上快樂。地下受災。輪迴報對。何時清閑。

天尊告太一曰。汝行願慈悲。衆生受苦。依汝行願。分身救之。童子喜笑。再拜而退。衆仙觀見童子。化一天尊。足躡蓮花。圓光照耀。手執柳枝。淨水。九頭獅子。左右從隨。乘空而去。又見天尊化一帝君。足躡蓮花。手執如意。圓光照耀。

九頭獅子左右從隨。乘空而去。又見帝君化一真人。足躡蓮花。手放神光。上通九天。下通九地。九頭獅子左右從隨。乘空而去。又見真人化一女子。身著火錦襖衣。披髮跣足。躡於蓮花。手執金劍。圓光照耀。九頭獅子口吐火焰。遶於身形。乘空而去。老君奏

天尊曰。此聖威德變化。救生從何而有。甚劫修行。惟願應機。爲衆宣說。

天尊曰。此聖在天呼爲太一福神。在世呼爲大慈仁者。在地獄呼爲日耀帝君。在外道攝邪呼

爲獅子明王。在水府呼爲洞淵帝君。汝是吾之  
氣。吾是汝之根。汝知吾知。此是九陽之精。甚靈  
甚靈。汝可祕之。不可盡述。是時

老君聞

天尊言。閉目定神。彈指叩頭。呪曰。

元元之祖氣

妙化九陽精

威德布十方

恍恍現其真

三九揚風出

徘徊離始青

恭敬生瓊液

奉之免渴饑

萬靈當信禮

入苦不能隨

積行持科戒

提攜證玉京

爾時

天尊重告老君及諸仙曰。若有衆生。時遭疾疫。病痛纏綿。可以焚香念誦聖號。看轉此經。疾患退散。克獲安寧。若有衆生。求官覓職。姦佞妄生。但當念誦聖號。看轉此經。自然嫉妬不生。高遷祿秩。若有衆生。泛涉江海。波浪所驚。魚龍欲傷。可以存思念誦聖號。便得達岸。無有害傷。若有衆生。值雷霹靂。風雨驚怖。但當存思念誦聖號。神氣爽清。魂魄不動。若有衆生。父母師資。六親不和。兄弟乖踈。但當存思念誦聖號。看轉此經。自感六親和睦。父慈子孝。兄友弟恭。若有帝王。



國主朝生叛臣。兵火作亂。風雨不調。萬民塗炭。怨地尤天。但當持齋念誦。看轉此經。風雨便得順時。叛臣敗露。國泰民安。若有衆生爲邪精鬼。賊妄來所傷。但當存思念誦聖號。妖魅自止。鬼賊滅亡。若有衆生山林往來。被蟲蛇禽獸奔奪所傷。但當存思念誦聖號。禽蟲自退。不敢來害。若有女人懷受胎孕。臨產艱難。但當存思念誦聖號。自感真氣佑護。無痛無傷。便生智慧之男。有相之女。六根具足。母子團圓。若有男子女子慕道求仙。在家出家。養性養命。但當存思念誦

聖號。看轉此經。便得功行圓滿。白日昇天。若有  
衆生。頻遭枷鎖牢獄之中。呻吟難訴。但當存思  
念誦聖號。便得解脫。出離囹圄。若有衆生。爲七  
祖九先。門人同學。夫妻男女。身歿之後。流滯寒  
庭。未得託生。但當存思念誦聖號。自然出離陰  
境。便得生天。若有衆生。爲冤家牽引。復連相纏。  
但當存思念誦聖號。冤家解釋。復連斷除。於是  
天尊告老君曰。此聖最尊最貴。最聖最靈。每月  
三九日。多降人間。常於淨室中。焚香禮拜柳枝  
淨水。時花藥苗。如法供養。自然壽滿一百二十

五福常臻。入難遠離。切忌竈下灰燼。石榴穢物。此爲不潔。勿令觸之。爾時。

天尊說經畢竟。大會之中。羣仙唱善。獅子能語。鳳凰能言。魚龍成人。枯朽還生。蠢動含情。福資皆徧。巍巍堂堂。皆得昇仙。於是道君老君。無量衆真。同聲讚嘆。今聞妙音。大獲利益。奉辭而退。

太一救苦護身妙經終

太上洞玄靈寶救苦妙經

爾時

救苦天尊徧滿十方界。常以威神力。救拔諸衆生。得離於迷途。衆生不知覺。如盲見日月。

我本太無中。拔領無邊際。慶雲開生門。祥煙塞死戶。初發玄元始。以統祥感機。救一切罪。度一切厄。渺渺超仙源。蕩蕩自然清。皆承大道力。以伏諸魔精。空中何灼灼。名曰泥丸仙。紫雲覆黃老。是名三寶君。還將上天氣。以制九天魂。救苦諸妙神。善見救苦時。天上混無分。天氣歸一身。混合空洞炁。皆成自然人。自然有別體。本在空洞中。空洞跡非跡。徧體皆虛空。第一委氣立。第

二順氣生。第三成萬法。第四主光明。天上三十六。地下三十六。太玄無邊際。妙哉大洞經。歸命太上尊。能消一切罪。

東方玉寶皇天尊

南方玄真萬福天尊

西方太妙至極天尊

北方玄上玉宸天尊

東北方度仙上聖天尊。東南方好生度命天尊

西南方太靈虛皇天尊。西北方無量太華天尊

上方玉虛明皇天尊

下方真皇洞神天尊

道言十方諸天尊。其數如沙塵。化形十方界。普濟度天人。委氣聚功德。同聲救罪魂。罪魂實可

哀我今說妙經。念誦無休息。歸身不暫停。天堂  
享大福。地獄無苦聲。火翳成清暑。劍樹化爲騫。  
上登朱陵府。下入開光門。超度三界難。徑上  
元始天。於是飛天神王。無鞅數衆。瞻仰  
尊顏。而作頌曰。

天尊說經教

引接於浮生

勤修學無爲

悟真道自成

不迷亦不荒

無我亦無名

朗詠罪福句

萬徧心垢清

爾時飛天神王及諸仙衆。說是頌畢。稽首  
天尊。奉辭而退。

太上洞玄靈寶救苦妙經終

志心皈命禮

青華長樂界。東極妙嚴宮。七寶芳鸞林。九色蓮  
花座。萬真環拱內。百億瑞光中。玉清天寶尊。應  
化玄元始。浩劫垂慈濟。大千甘露門。妙道眞身。  
紫金瑞相。隨機赴感。誓願無邊。大聖大慈。大悲  
大願。十方化號。普度衆生。億億劫中。度人無量。  
尋聲赴感。太一救苦天尊。青玄九暘上帝。

經讚

青華教主 太乙慈尊 玉清應化現金身

靈九道壇印版

大千甘露門 接引羣生 永出愛河津

太一救苦天尊 三稱

願以此功德 普及於一切  
誦經保平安 消災增福壽

偈言

青華聖境妙嚴宮	紫霧明霞徹太空
五色蓮花生足下	九頭獅子坐雲中
覃恩養育開東極	道運慈悲攝北豐
惟願垂光來感應	無邊法雨降玄穹
太歲甲午年吉日	靈九道壇重輯應供十方





